

04/09/2003

MCA tingkat promosi sertai polis

KUALA LUMPUR: MCA akan berusaha meningkatkan kesedaran ibu bapa belia Cina mengenai pentingnya golongan itu menyertai pasukan polis dan tentera, kata Presidennya, Datuk Seri Ong Ka Ting.

Beliau berkata, masyarakat Cina mesti mengubah sikap dan jangan asyik memikirkan soal gaji, tetapi perlu menimbangkan secara serius kepentingan kerjaya itu sebagai tugas mulia bagi menjaga keselamatan negara.

"Malaysia memerlukan polis dan tentera berbilang kaum. Cina adalah kaum kedua terbesar di negara ini dan saya harap ada belia Cina yang akan menjadi wakil," katanya yang juga Menteri Perumahan dan Kerajaan Tempatan pada sidang media di sini, semalam.

Polis mengadakan temu duga terbuka selama sebulan mulai kelmarin hingga 1 Oktober ini. Bagaimanapun, hanya dua belia Cina yang menghadiri temu duga pada hari pertama.

Pada 27 Ogos lalu, Timbalan Pengarah Pengurusan Bukit Aman, Datuk Talib Jamal, berkata keengganan belia Cina menyertai Polis Diraja Malaysia menyukarkan pasukan itu menempatkan anggotanya di kawasan yang didiami majoriti masyarakat Cina dan mendapat maklumat lengkap serta jelas dalam penyiasatan sesuatu kes.

Ong berharap belia Cina yang memenuhi syarat supaya memberi pertimbangan serius untuk menyertai pasukan polis dan tentera.

Beliau berkata, MCA melalui jawatankuasa kecil yang diselaraskan Timbalan Menteri Dalam Negeri, Datuk Chor Chee Heung dan Ketua Pemuda, Datuk Ong Tee Keat akan mengadakan kempen menggalakkan penyertaan belia Cina sebagai polis dan tentera.

Terdahulu, Ong berkata, Persidangan Kebangsaan Bagi Memupuk Budaya Penyelenggara yang pertama akan diadakan selama dua hari mulai 22 September di Hotel Renaissance Palm Garden Putrajaya.

Beliau berkata, kira-kira 450 peserta dari jabatan kerajaan, pemaju hartanah, arkitek dan pembekal kemudahan awam termasuk Tenaga Nasional Berhad serta pihak berkuasa lebuhraya dijangka menghadiri persidangan yang bakal dirasmikan Timbalan Perdana Menteri, Datuk Seri Abdullah Ahmad Badawi.

Katanya, pada masa ini kerajaan terpaksa membelanjakan sejumlah besar wang untuk menyelenggara semua aset dan kemudahan awam setiap tahun.

"Seperti yang dikatakan Perdana Menteri, Datuk Seri Dr Mahathir Mohamad bahawa Malaysia mempunyai infrastruktur setaraf negara maju tetapi penyelenggaraan negara ketiga. Kita boleh membina apa saja tetapi gagal untuk menyelenggara," katanya.